



Il vecjo Cornelius, capo dai motârs di Cjamin, al è quasi pront par partî. Al è alt e muscolôs, ma une vore simpatic. Al met su i siei blugins neris un pôc scussâts e il so gjubot preferît, chel di piel cu lis pontis di arint su lis spalis. Sul cjâf spelât al pare sù il casc a forme di crampus cu la creste rosse tal mieç, lassant vignî fur lis mostacjis e la barbe blancje.

Vuê al à apontament cu la bande dai motârs siei amîs par lâ a mangjâ une pize te tratorie in vie San Vidot.

Ancje Fred il Spachevues al è rivât puntuâl al apontament sul Puint di Mieç dal Vâr. Nossere zuiant di briscule al à pierdût i ultins bêçs che al veve, al è restât a sut dal dut. Ma Fred al à un plan...

Rivâts in tratorie cun ducj i amîs motârs a ordenin la pize e la mangjin di gust. Cornelius al è cussì content de domenie in compagnie dai amîs che al fâs la propueste di fâ un zîr in moto.

Cussì ducj si preparin par partî sgasant lis motos lustris e cromadis.

Fred il Spachevues però al dîs a chei altris di lâ indevant cence spietâlu, che ju varès cjapâts lui dopo.

Il vecjo Cornelius, che al è simpatic ma no stupit, al reste ancje lui te tratorie par tignîlu di voli, platât daûr di une coloni.

Fred al va devant de casse e al tire fûr dal gjubot il revolver: "Daitmi i bêçs o i copi ducj!" E al trai un colp al canarin che al svoletave te sô scjaipule. L'ucelut al cole ju sec, la cassiere e tremé di pôre...

Cornelius al salte fûr e i da jù un grant colp tal cjâf cul so casc crampus, lu colpis di daûr propit cu la creste piturade di ros... Fred Spachevues al cole ju sturnît... Cornelius i cjal il revolver intant che la cassiere e clame la polizie. La rapine e je sfantade!

Il titolâr de tratorie al premie il vecjo Cornelius cuntun an di pize gratis. Però, stant che al ere sparagnin, i dave dome la pize margarite!

***Conte ispirade a une idee di Eros,
Filippo, Giorgio, Marco, Pietro
judâts di Gabriele (Pomel)
voltade par furlan de Stralunade***
#1013